

摘藻堂四庫全書薈要

集部

欽定四庫全書薈要

集部

御定歷代題畫詩類卷四十三

四

詳校官原任主事

臣李斯咏

欽定四庫全書薈要

御定歷代題畫詩類卷四十三目錄

故實類

班婕妤題扇圖

元戴表元

班姬圖

元袁桷

團扇圖

元袁桷

題班婕妤題扇圖

元陳旅

班姬吟扇圖

元吳師道二首

班姬題扇圖

元錢惟善

題班婕妤題扇圖

明姚廣孝

題班姬秋扇圖

明陳泰

孟光舉案圖

元王執謙

孟光捧案圖

元王暉二首

蔡琰歸漢圖

明林景清

蔡琰歸漢圖

元王暉

蔡琰圖

元馬祖常二首

題蔡琰還漢圖 元王逢

蔡琰歸漢圖 明蘇平

蔡琰歸漢圖 明周鼎

題胡笳十八拍圖 元王惲五首

賦得文姬望月為袁拒伯題畫 明張鳳翼

二喬觀史圖 元王惲

二喬圖 元張憲

題二喬圖 元張天英

題二喬圖 元姚文奐

二喬圖 元雅琥

題二喬觀書圖 元楊維禎

二喬圖 元唐肅

題二喬圖 明劉基

二喬觀兵書圖 明高啟

二喬觀書圖 明方孝孺

二喬圖 明王恭

二喬觀書圖 明徐賁

二喬觀書圖 明丘濬

二喬觀兵書圖 明沈愚

小喬觀書圖 明王紱

陶母剪髮橫披 元劉因

題陶母延賓圖 明廖道南

綠珠圖 元袁桷

題金谷園圖賦得綠珠怨 明邊貢

王夫人讀書圖

明陳繼儒

壽陽公主折梅圖

元王惲二首

壽陽圖

元袁桷

壽陽梅妝圖

元王思廉

題凌媼隱居圖

明高遜志

凝妻斷臂圖

明程敏政

題蘇若蘭迴文錦詩圖

宋黃庭堅

題織錦璫璣圖

宋孔平仲五首

擬題織錦圖

宋秦觀

織錦迴文圖

元許有壬

題織錦回文圖

元馬祖常

織錦圖

元楊維禎

題張麗華圖

元王惲

張麗華圖

元袁桷

題錢舜舉張麗華侍女汲井圖

元吳萊

題隋宮清夜遊圖

明童瑄

題紅拂妓

明高啟

紅拂圖

明顧璘

為周公美題壁間紅拂妓

明劉世教

題長孫皇后諫獵圖

元張翥

長孫皇后免冠圖

元鄭元祐

則天朝回圖

元王惲

則天春思圖

明瞿佑

梅妃吹笛圖

明余泰

欽定四庫全書薈要卷一萬九千一百五十一集部

御定歷代題畫詩類卷四十三

故實類

班婕妤題扇圖

元戴表元

時情任銷歇
閨思轉殷勤
也勝山陰媼
揮毫託右軍

班姬圖

元袁桷

望幸眸凝秋水倚
愁眉簇春山已悟
篋中紈扇須看鏡
裏朱顏

團扇圖

元
袁 桷

玉樹秋殘翠影疎
掩門何處望金輿
昭陽殿裏渾閑事
最恨當年李婕妤

題班婕妤題扇圖

元
陳 旅

層城柘館重裴回
坐見瑤階長綠苔
紈扇秋來定無用
君王方築避風臺

班姬吟扇圖

二首

元
吳師道

已信當年有綠衣
漫將團素寫新詩
才明自斷衰榮夢

肯對秋風作許悲

當暑提攜識暫憐
安身篋笥任長捐
昭陽極寵昭臺怨
得似斯人晚自全

班姬題扇圖

元錢惟善

無復承恩柘館春
偶題紈扇淚盈巾
賦成不費黃金買
羞比長門失寵人

題班婕妤題扇圖

明姚廣孝

玉容憔悴暮偏饒
羅扇題詩恨莫消
不是恩情中道絕

西風昨夜到芭蕉

題班姬秋扇圖

明陳泰

搖落秋梧十二闌
掌中心事扇中看
君恩不似齊紈薄
無奈瑤臺風露寒

孟光舉案圖

元王執謙

白髮梁鴻與世乖
賴逢光也配其才
五噫歌罷愁無奈
不覺春從案上來

孟光捧案圖

二首

元王惲

五噫歌裏動晨炊一敬還驚案等眉想得主人茅宅下
肅雍形出二南詩

吳門煙暖褐衣輕春賃中間見本情豪蕩阿戎那解此
夢回青瑣得卿卿

蔡琰歸漢圖

明
林景清

文姬別子地一騎輕南馳傷哉賢王北一騎挾二兒二
兒抱父啼問母何所之停鞭屢回首重會知無期孰謂
天壤內野心無人彞萬物以類偶濕化猶相隨穹廬况

萬里日暮驚沙吹惜哉辨琴智不辨華與夷縱憐形勢
迫難掩節義虧獨有思漢心寫入哀絃知一朝天使至
千金贖蛾眉雨露洗腥癰陽和變愁姿出關拜漢月照
妾心苦悲妾心儻未白何以覲彤墀狐死尚丘首越鳥
終南枝如何李都尉沒齒陰山陲

蔡琰歸漢圖

元王惲

明妃光寵照龍沙枉說琵琶憶漢家去住兩難心最苦
就中哀怨是胡笳

蔡琰圖 二首

元馬祖常

胡月還如漢月圓
龍堆沙水咽哀絃
文姬此夕穹廬夢
應到春閨舊鏡前

踏歌誰唱木腸兒
頗念中郎哭女時
衛霍不生陵不死
望鄉臺畔盡相思

題蔡琰還漢圖

元王逢

銅臺春深遶草綠
琰因名父千金贖
殘生既免羶裘鬼
哀衷莫盡蘆笳曲
舊時漢妝慵復理
感義懷慙歸董祀

入朝好語亂世雄賤妾不為天地容爾其忠事山陽公

蔡琰歸漢圖

明蘇平

中郎有女貌如花流落單于歲月賒
北去千金勞漢使南來萬里度龍沙
哀吟調入邊笳慘歸路愁看塞鴈斜
腸斷胡兒分手處黃雲衰草隔天涯

蔡琰歸漢圖

明周鼎

縱多文思出天機贏得胡笳淚滿衣
萬里歸來身再辱不如青塚不言歸

題胡笳十八拍圖

五首

元王惲

畫却春山理素琴
翠簾香鎖落花深
豈知中有胡笳恨
吹折關山一寸心

胡笳翻曲太含情
不道倉皇義重生
舊怨未平新恨疊
鴈聲纔罷又邊聲

乾翻坤覆困蛇龍
女子柔衷鮮克終
全着黃金歸蔡琰
不知何地置揚雄

憔悴風沙十二年
得歸情義轉相牽
董郎庭戶雖依舊

已是蘭摧白露前

才慧其如薄命何猶能知恥見悲歌寥寥誰謂邕無後
得讀離騷幸儘多

賦得文姬望月為袁拒伯題畫

明張鳳翼

寒影千山外清光兩地同圓時思漢鏡缺處歎胡弓白
草嘶征馬黃沙落斷鴻悲笳應寄恨聊復託長風

二喬觀史圖

元王惲

二喬絕豔煽江東一札龍韜閱未終多是周郎傳報捷

華容燒虜夜來空

二喬圖

元張憲

並倚兩嬌嬈人呼大小喬
腕鬆紅玉釧釵簪紫金翹
公瑾應同調孫郎早見招
獨憐銅雀瓦風雨夜蕭蕭

題二喬圖

元張天英

喬公二女如花顏玉宮仙
樹參差間鳳裾鸞書明月環
寶釵壓墮青雲鬟手撚丹霞染天章
繡屏曉卧珊瑚牀
石鏡山前瓊草香春風蕩漾紫鴛鴦
嬌歌雙笑蘭煙蒼

中軍留醉牙帳光回頭兩鬢飛秋霜

題二喬圖

元姚文奐

喬公二妹皆國色一嫁周瑜一孫策不緣烈火走曹瞞
鄴下三臺誇虜獲雒京妝束絕世姿春風縹緲柳腰肢
深閨姊妹共憐愛畫史想像如當時嗟嗟二壻人中傑
半道傷摧瑤樹折至今恨濃妾命薄恨似沉沙未消鐵
念奴嬌詞歌一闋愁絕東坡酹江月

二喬圖

元雅琥

珊樹交加玉樹重鴛鴦難偶雪難容共思漢事隨流水
各對吳儂感遠峯洛賦未成梁月墮胡笳已斷塞雲濃
人間流落渾相似猶勝淒涼泣莫蛩

題二喬觀書圖

元楊維禎

喬家二女雙芙蓉一代國色江之東亂離唯恐埋百草
豈料一日俱乘龍江東子弟孫郎策同住周郎道南宅
弟兄不減骨肉親喜作喬家兩嬌客明年符死鏡中妖
銅雀春深愁大喬自是阿瑜能了事黃星一道隨煙銷

小喬初嫁有如此天下三分從此始風流顧曲本多才
風雨雞鳴戒君子喬家教女善詩書豈比小姑持刀為
帳中草檄名漢賊已知事屬方頭兒君不見阿瞞老贖
蔡文姬博學才辯何所施天下羞誦胡笳詞

二喬圖

元唐肅

大喬嫁孫策小喬嫁周瑜君臣政爾圖伯業胡乃受此
雙明珠君不見斬蛇赤帝子君不見屠狗樊將軍君能
聽諫臣能諫秦宮婦女何足云

題二喬圖

明劉基

江上桃花紅粉腮偶然吹入玉堂來東風日暮和煙雨
多少飄零委綠苔

二喬觀兵書圖

明高啟

共憑花几倚新妝玉女陰符讀幾行銅雀那能鎖春色
解將奇策教周郎

二喬觀書圖

明方孝孺

深閨睡起讀兵書窈窕丰姿若个誰千古周南風化本

晚涼何不誦關雎

二喬圖

明王恭

雙蛾嬌掩為誰顰反被榮華誤却身回首東吳何事歎
野煙寒水更愁人

二喬觀書圖

明徐賁

孫郎武畧周郎智相逢便結君臣義丰姿聯璧照江東
都與喬公作佳壻喬公雖在亂離中門闌喜色雙乘龍
大喬娉婷小喬媚秋波並蒂開芙蓉身嫁英雄知大節

日把詩書自怡悅不學分香歌舞兒銅臺夜泣西陵月

二喬觀書圖

明丘濬

門闌多喜氣兩壻總英雄坐使江東大能無內助功

二喬觀兵書圖

明沈愚

一卷龍韜講未終溫柔鄉裏出英雄二豪不得陰謀助
敢向江東立伯功

小喬觀書圖

明王紱

雲髻新妝珠翠團杏花零落曉風寒每憐春事傷心處

偷把周郎曲譜看

陶母剪髮橫披

元劉因

剪髮英明子可知披圖三歎淚雙垂
阿娘襟量如陶母爭信癡兒到老癡

題陶母延賓圖

為李母壽

明廖道南

君不見陶氏之母稱惠慈草堂賓筵無所資
一飯豈足酬知己百璧應知為爾師
李門有母似陶母誨子義方仁且壽
豸繡當年照綵衣朱藩此日斟春酒
衡州直接

鄂州遙天柱山前絳節朝采藥朱陵膏雨細餌芝紫蓋
瑞霞飄還占寶婺星華曙南岳夫人在何處為遣雲璈
萼綠華添籌海屋春長貯

綠珠圖

元 袁 桷

金谷煙迷清曉玉簫春怯餘寒可恨花鈿委地當時莫
倚危闌

題金谷園圖賦得綠珠怨

明 邊 貢

誰言妾命薄結髮承主恩誰謂妾身輕寵冠金谷園園

中桃李千萬樹對妾妍華避無處裴回歌舞曲未終門
外戰鼓聲逢逢當時只倚紅顏貴豈料紅顏為主累主
家高樓天與齊妾身不惜委黃泥他生願作銜泥燕長
傍樓中梁棟棲

王夫人讀書圖

明
陳繼儒

碧霞侍者性清虛終日焚香自埽除賢媛從來登世說
仙人畢竟好樓居燕聽梁上無私語螢鑒窗前有道書
異日宮闈徵女憲明珠為佩錦為車

壽陽公主折梅圖 二首

元王 惲

滿庭梅影媚春陽
粉萼封香散麝囊
折得一枝春在手
含章宮閣鬪新妝

寶檐么鳳探芳叢
瓊蕊飛翻入卧中
一自粉絲輕拂散
暗香吹滿壽陽宮

壽陽圖

元袁 桷

一片花飛宮裏十分春
滿眉端底用流酥
點綴更煩圓
玉璫團

壽陽梅妝圖

錢選畫

元王思廉

一聲白鴈度江潮，便覺金陵王氣銷。
畫史不知亡國恨，猶將鉛粉記前朝。

題凌媼隱居圖

明高遜志

陶令歸來日躬耕，不厭貧賤問誰解。
同志賴有翟夫人。

凝妻斷臂圖

明程敏政

含元殿中如博陸，寡婦孤兒肯容宿。
此身原是未亡人，一臂寧為一身辱。
落日荒原聞哭聲，白刃可蹈千人驚。

五朝長樂癡頑老一夜河間齧臂盟

題蘇若蘭回文錦詩圖

宋黃庭堅

千詩織就回文錦如此陽臺暮雨何亦有英靈蘇蕙手
只無悔過竇連波

題織錦璫璣圖

五首

宋孔平仲

紅窗小泣低聲怨永夕春寒斗帳空中酒落花飛絮亂
曉鶯啼破夢惺惺

晞草露如郎行薄亂花風似客情多歸鴻見處彈珠淚

語燕聞時斂翠蛾

同誰更倚閑窗繡落日紅扉小院深東復西流水嶺
恨兼愁續斷絃琴

腸斷寫愁縈字字錦文傳意寄君看牀空照月殘燈冷
黃葉霜風愁信寒

前堂畫燭殘凝淚半夜清香舊惹衾煙鎖竹枝寒宿鳥
水沉天色霽橫參

擬題織錦圖

宋
秦觀

悲風鳴葉秋宵冷寒絲縈手淚殘妝微燭窺人愁斷腸
機翻雲錦妙成章

織錦迴文圖

元許有壬

明珠金縷爛縈回香玉連環剪不開不把肺肝都織出
將軍惟識趙陽臺

題織錦回文圖

元馬祖常

桃葉渡江不用楫織女烏鵲填河白合歡樹下宜男草
草色不及羅裙好織錦度曲聲亦柔黃龍塞是契丹州

夫君戍歸定何日樂府陳娘歌第一

織錦圖

元楊維禎

秋深未寄衣絡緯上寒機斷織曾相戒夫君不用歸

題張麗華圖

元王惲

璧月瓊枝醉舞裊泠泠蘭舌半詞臣國亡只咎傾城色
井上臘脂井底春

張麗華圖

元袁桷

結綺塵空樓暗景陽春斷鐘遲紅葉無言在手同成井

上臙脂

題錢舜舉張麗華侍女汲井圖

元吳萊

景陽宮中景陽井
手出銀盤牽素綆
鉛華不御面生光
寶帳垂綃花妒影
臨春結綺岫層空
壁月瓊枝狎客同
鴛鴦戲水池塘雨
蛺蝶尋香殿閣風
日高歡宴驕若訴
牀脚表章昏不寤
吳兒白袍戰鼓死
洛土青蓋降船渡
井泥無波井闌缺
半點臙脂汙緋雪
蕙心蘭質吹作塵
目斷寒江鎖江鐵

題隋宮清夜遊圖

明童瑄

闌干月轉垂楊影露華如水銀屏冷君王西院夜未眠
紫衣小隊前驅引清歌踏月立調遲妙舞翻雲翠袖低
綠鬟侍擁抹螺黛行行按節金蓮齊十六院中多雅趣
臺觀縈紆疊青翠菱荷池館晚風涼剪綵為花能巧製
鑾輿馳逐過離宮蓬萊路與瀛洲通周環佳勝二百里
終宵行樂心無窮絳紗寶燭銷紅雪珠箔重重卷明月
宿鳥驚飛花底枝銅龍水向樓頭咽追歡只謂常如斯

興亡豈意皆人爲一朝天下共騷動始知樂極還生悲
向來富貴知何許一代繁華逐流水愁絕殘垣敗草深
幾度疎螢照寒雨

題紅拂妓

明高啟

花枝不鎖後堂春半夜長安旅邸貧棄去老奴從此客
可憐小妓亦知人

紅拂圖

明顧璘

紅拂蕭騷紫麟尾夜半蒙羞見君子佳人絕代失相知

越國麤豪一何鄙天造草昧兮臣擇君幽憤結遏兮女
求士卷衣杖策趨軍門末路英雄儻如此蘭心天矯舍
風雲莫歌行露嘲文君

為周公美題壁間紅拂妓

明
劉世教

羞將粉黛駐容華縱有雄心忍自誇惆悵朱門花底月
可憐依舊照君家

題長孫皇后諫獵圖

元
張翥

黃門曉出西清仗秋色滿天鷹犬王虎落遙連渭水南

鸞旗直渡河橋上日邊雲氣五色文虬鬚天子真天人
羽林猛士森成列六氣不驚清路塵太平無征帝神武
豈為禽荒將按虜已知哲后佐興王不數樊姬能霸楚
從容數語即罷田六宮迎笑花如煙蹕回那待外庭疏
聽諫由來同轉圜天寶神孫隳大業錦繡五家爭蹀躞
可憐風雪驪山宮正與真妃同射獵

長孫皇后免冠圖

元鄭元祐

貞觀聖人還紫宮按劍欲殺田舍翁翁本帝仇今作輔

逆鱗易批難論功后聞君言心慘惻自古君明則臣直
直臣脫若死無辜賤妾一身亦奚惜免冠再拜明主前
陰扶紅日行青天他時拭目看陵樹不以大義虧其全
則天朝回圖

元王惲

萬有潛隨一氣回武炎如火李如灰上陽宮殿春風暖
花底朝鞭隱若雷

則天春思圖

明瞿佑

朝罷金輪出上陽詔書火急報春光苑中漫有千紅紫

不及蓮花似六郎

梅妃吹笛圖

明俞泰

音律從來壽邸長
宮中新調稱新妝
誰知吹出無雙曲
究為鬼坡訴斷腸

御定歷代題畫詩類卷四十三

欽定四庫全書薈要

御定歷代題畫詩類卷四十四目錄

故實類

題太真春睡圖

元岑安卿

題楊妃春睡圖

元楊維禎

題太真睡起圖

元吳景奎

楊妃春睡圖

明徐渭

楊妃春睡圖

明田登

題貴妃春醉圖 明胡直

楊妃醉仆圖 明周鼎

楊妃醉歸圖 明周鼎

貴妃夜遊圖 宋方岳

題楊妃出遊圖 明李東陽

太真玩月圖 明陶安

貴妃妙舞圖 明解縉

題畫楊妃調鸚鵡圖 元周伯琦

太真教鸚鵡圖

元馮渭

太真上馬圖

元朱德潤

楊妃上馬圖

元吳師道

楊妃上馬圖

元鄭元祐

題玉環聯轡圖

元宋元

楊太真剖瓜圖

明吳寬

周昉畫楊妃禁齒圖

元王惲

華清曲題楊妃病齒

元薩都刺

玉環病齒圖

元宋无

楊妃舞翠盤圖

明謝承舉

虢國夫人夜遊圖

宋蘇軾

次韻虢國夫人夜遊圖

宋李綱

題虢國夫人夜遊圖

元姚樞

題虢國夫人早朝圖

明詹同

題虢國夫人宴歸圖

明沈周

題虢國夫人夜遊圖

明文徵明

秦虢夫人走馬圖

宋蘇轍二首

題秦虢二夫人承召遊華清宮圖

元虞集

題黃門飛鞚圖

元王惲二首

題崔婦乳姑圖

明廖道南

題杜韋娘圖

元華幼武

紅葉圖

元華幼武

題唐宮題葉圖

元雅琥

題紅葉題詩圖

元朱德潤

題美人書紅葉圖

明劉基

美人紅葉圖

明王佐

題紅葉仕女

明談震

題流紅圖

明林敏

盼盼燕子樓圖

明瞿佑

題主人壁間樊素小蠻圖

明石沆

題花蕊夫人像

元于立

朝雲誦偈圖

明瞿佑

題蘇小小像

元于立

題劉平妻胡氏殺虎圖

元王惲

再題胡烈婦殺虎圖

元王惲三首

為古紹先題劉平妻胡氏殺虎圖

元張翥

胡氏刺虎圖

元楊載

平妻殺虎圖

明程敏政

題高宗二劉妃圖

元潘純

[illegible]

欽定四庫全書薈要卷一萬九千一百五十二集部

御定歷代題畫詩類卷四十四

故實類

題太真春睡圖

元岑安卿

東風吹香蕩晴晝長
安宮殿花如繡
海棠一夜輕折紅
淑氣薰蒸困醇酎
太真徙倚沉香亭
宿醒未解春冥冥
眉峯斂翠翳秋色
侍兒夾擁花娉婷
玉牀膩滑芙蓉展
水沉煙裊金屏暖
丹腮融潤珊瑚溫
寶釵斜簪烏雲綰

上皇玉笛那敢吹地衣紅皺韉輕移傳令別殿罷歌管
流鶯不語游絲垂漁陽鼙鼓邊城動臺閣無言卿士慚
婦人一睡四海昏主闇臣諛總如夢翠華西狩九廟隳
禍胎未翦三軍疑馬嵬之夢生死訣一時悔禍人心歸
驪山舉燧供歡笑犬戎蹴踏周原草丹青誰寫春睡圖
後世不須箴大寶

題楊妃春睡圖

元
楊維禎

沈香亭前燕來後三郎鼓中放花柳西宮困人春最先

華清溶溶煖如酒，雪肌欲透紅薔薇。
錦襠卸盡流蘇幃，小蓮侍擁扶不起。
翠被卷作黎雲飛，蟠龍髻重未勝綰。
燕釵半落犀梳偃，晚漏壺中水聲遠。
簾外日斜花影轉，琵琶未受宣喚促。
睡重梨腰春正熟，不知小裯思塞酥。
夢中化作銜花鹿。

題太真睡起圖

元
吳景奎

興慶池邊花爛爛，清平調裏思飄飄。
玉環睡起嬌無奈，背立東風酒半消。

楊妃春睡圖

明徐渭

守宮夜落臘脂臂玉階草色蜻蜓醉花氣隨風出御牆
無人知道楊妃睡皂紗帳底絳羅委一團紅玉沉秋水
畫裏猶能動世人何怪當年走天子欲呼與語不得起
走向屏西打鸚鵡為問華清日影斜夢裏曾飛何處雨

楊妃春睡圖

明田登

長生殿屬春殘後春風亂拂宮門柳花奴念奴競霓裳
君王醉飲玉環酒梨花帶雨壓薔薇雲鬟不整倚羅幃

玉容慊慊點猩唇香魂漫逐胡蝶飛落花飛絮總不綰
鬢敲釵驪梳半偃蛾眉春困苦不勝翠袖頻翻拂杏臉
流鶯啼破夢初回報道君王來玉輦君道海棠花睡熟
玉笋纖長抱凝玉和來玉屑仙盤露渴心奈夢含花鹿
題貴妃春醉圖

明
胡直

歌罷霓裳一曲歡酒醺無力上雕鞍侍兒扶起雲鬟側
喜得君王駐馬看

楊妃醉仆圖

明
周鼎

妖環不醉三郎醉銀燭高燒看海棠滿地閒雲扶不起
楚臺無夢夢漁陽

楊妃醉歸圖

明周鼎

金鞍欲上更遲遲滿鏡春風擁侍兒一種餘酣消未得
漁陽醒眼却多時

貴妃夜遊圖

宋方岳

鳳辇又上玉花驄恩在君王一笑中三十六宮瑤草碧
不知多少恨春風

題楊妃出遊圖

明 李東陽

沈香亭前春日裏海棠睡足風吹起玉驄馱醉出華清
頭上綠雲嬌不理內人宣索已多時金鑾供奉來何遲
有誰並轡復顧笑不是秦姨定虢姨階頭奚官執鞚走
問渠合是安郎否不然那得近前行祇許籠禽隨吠狗
君不見馬嵬坡下蛾眉愁可憐白骨埋荒丘柳絲難綰
芳魂住應從君王萬里遊

太真玩月圖

明 陶安

華清浴後上龍樓得與冰娥共素秋貌對妝臺金照面
光涵宮髻玉搔頭梨園徹樂承歡暇桂闕當天為我留
翠輦何緣不同到宵衣應是罷宸遊

貴妃妙舞圖

明解縉

太真選入明光宮龍髯天子夢寐慵家遷將相李林甫
門喧市井楊國忠大家醉眼看榜落雙持玉節敲梧桐
鳳凰去矣不復至獨舞飛燕春風中宮壺龍渴曉漏盡
錦屏翠褥金泥融霓裳曲度未肯終潼關戰血燒天紅

嗚呼纖腰一束柳條重如何舞得乾坤動

題畫楊妃調鸚鵡圖

元周伯琦

朱顏顰鬢怯輕寒欲託奇毛吐肺肝想得劍關春日暮
夢中猶作海棠看

太真教鸚鵡圖

元馮渭

溫泉賜浴意融怡猶念寧王玉笛吹却怕能言泄幽事
丁寧慎勿語人知

太真上馬圖

元朱德潤

開元朝野時清明姚宋廟謀多輔成紫宸殿前焚錦繡
花萼樓高延弟兄那知暇豫生淫樂慢舞霓裳羽衣薄
龍輦流禍入宮牆野鹿銜花汙簾箔春晴並轡曲江行
回顧阿環嬌態生繡衣珠玑如花旋秦虢夫人恩寵新
宮中昇出錦綳兒兵滿漁陽人未知一朝犯順入宮闕
咸陽煙塵迷日月翠華雜沓驚塵蒙劍閣西迴渭水中
王臣下微同列國從此藩鎮爭豪雄人生富貴真迷途
傾城褒姒無時無漫道玄宗不知政試問當年無逸圖

楊妃上馬圖

元 吳師道

花擁金鞍步步遲
君王別殿待多時
延秋門外驚塵起
夜半無人見疾馳

楊妃上馬圖

元 鄭元祐

華萼樓前上馬時
君王忘是壽王妃
龍顏含笑待持鞚
海棠睡美春風吹
繡鞍嬌凭翠裳冷
金轡擬跨絲鞭垂
宮韉拍鞵欲馳及
簌簌步搖危不支
後宮窈窕干蛾眉
並乘腰裏黃金羈
芙蓉濯露總殊妙
雜遝綺羅知為誰

獨擁妖環何所之
聯翩欲向華清池
雙龍嚙膝踏花去
錦香覆滿紅臙脂
從官車騎空瞻望
並肩私語行遲遲
行毋遲遲日已西
漁陽鐵騎崩雲追
纔出都門便別離
千載形迹令人悲
再拜能忘臣甫詩

題玉環聯轡圖

元 宋 无

赭袍紅映鏤金衣
笑並花驄酒力微
試問六龍西幸日
有人曾侍翠華歸

楊太真剖瓜圖

明 吳 寬

深宮六月涼風至，紈扇團圓奪秋氣。却恨君王賜浴遲，
華清水熱通宵沸。金刀手弄雲鬟低，楊柳樓頭日已西。
莫誇碧碗紅瓢美，玉齒病來憎瓠犀。

周昉畫楊妃禁齒圖

元王惲

海棠春睡儘紅嬌，苦殢三郎厭早朝。人到愛深無惡相，
捧心顰處更妖嬈。

華清曲題楊妃病齒

元薩都刺

沉香亭北春晝長，海棠睡起扶殘妝。清歌妙舞一時靜，

燕語鶯啼空斷腸
朱脣半啟榴房破
胭清紅注珍珠顆
一點春酸入瓠犀
雪色鮫綃濕香唾
九華帳裏熏蘭煙
玉肱曲枕珊瑚偏
玉釵半脫翠蛾斂
龍髯天子空垂涎
妾身雖侍君王側
別有閑情向誰說
斷腸塞上錦裯兒
萬恨千愁言不得
成都遙進新荔枝
金盤紫露甘如飴
紅塵一騎不成笑
病中風味心自知
君不聞華清宮一
齒作楚藏禍根又
不聞馬嵬坡一身
濺血未足多漁陽
一日鼙鼓動始覺
開元天下痛雲臺
不見漢功臣三十

六牙何足用明眸皓齒今已矣風流何處三郎李

玉環病齒圖

元 宋 元

一點春寒入瓠犀海棠花下獨顰眉內廚幾日無宣喚
不問君王索荔枝

楊妃舞翠盤圖

明 謝承舉

妃子承私眷君王愛宴游風旋朱袂薄雲擁翠盤秋宛
轉花千態低昂月半鉤梨花僧寺夢遺恨蜀江頭

虢國夫人夜游圖

宋 蘇軾

佳人自鞚玉花驄，翩如驚燕蹋飛龍。
金鞭爭道寶釵落，何人先入明光宮。
宮中羯鼓催花柳，玉奴絃索花奴手。
坐中八姨真貴人，走馬來看不動塵。
明眸皓齒誰復見，只有丹青餘淚痕。
人間俯仰成今古，吳公臺下雷塘路。
當時亦笑張麗華，不知門外韓擒虎。

次韻虢國夫人夜遊圖

宋李綱

金鞍玉勒連錢駒，車如流水馬如龍。
遺簪墮珥碎珠翠，密炬夜入蓬萊宮。
曲江宮殿春蒲柳，玉盤犀筋傳纖手。

坐中綽約盡天人錦茵雲幕清無塵賜名大國動光彩
馬嵬回首空啼痕我欲題詩弔千古喪國亡家皆此路
嫣然一笑傾人城皓齒明眸真女虎

題虢國夫人夜遊圖

元姚樞

宴安懷鴆毒蕩佚國將亡緬思天寶載聲色迷君王朝
政出多門十九分權綱其誰堪炙手秦虢連諸楊攀附
勢莫比所冀保椒房宮中陪宴樂晝短疑夜長重為長
夜遊細馬馱寶裝胡不秉明燭晏行撤禮防一從此風

熾野鹿踰宮牆五嶽出洛泝四海同慘傷維時所貴顯
赤族亦罹殃馬嵬脂粉暗岷山涕泗滂明年雖幸還大
海翻田桑山河增慘澹日月銷精光問民瘡痍中哭廟煨
燼女寵禍何酷百悔不一償在莒豈足擬於茲不可
忘

題虢國夫人早朝圖

明詹同

青絲絡頭白鼻騮楊家有女顏如花金門半開天欲曙
蛾眉淡掃朝官家官家鼾睡起未早阿姨一來即傾倒

中使傳宣出紫宸信是人家生女好合歡花瘁沈香亭
玉環宿酒渾未醒春風暗送年華老綠衣飛報疇能聽
金錢賜浴恩澤新溫泉不洗馬嵬塵底事畫工心獨苦
圖中偏寫虢夫人

題虢國夫人宴歸圖

明沈周

倚馬嬌羞認八姨春酣歸院日斜時回頭聞得漁陽鼓
猶料催花輟宴遲

題虢國夫人夜遊圖

明文徵明

紫塵拂轡春融融參差飛鞚驕如龍錦韉繡帶簇妖麗
絳紗玳燭圍春風春風交花光屬路後騎雍容前却顧
中間一騎來逡巡秀眉玉頰真天人翠微垂鬢極稱身
彷彿當年號與秦佳人絕代真難得安得君王不為惑
豈知尤物禍之階不獨傾城竟傾國一時喪亂已足憐
後世方誇好顏色晴窓展卷漫多情百年青史自分明
莫言畫史都無意尺素還堪鑒興廢

秦虢夫人走馬圖

二首

宋蘇轍

秦號風流本一家豐枝穠葉映雙花欲分妍醜都無處
夾道遊人空歎嗟

朱幘玉勒控飛龍笑語喧譁步驟同馳入九重人不見
金鈿翠羽落泥中

題秦號二夫人承召遊華清宮圖

元虞集

貴人並輓如輕鴻承恩馳入華清宮道途先不止行客
策蹇奔趨烏帽風奚囊墮地何足拾豈有篇章浪相及

畫史當時妙墨傳光彩流動狂情急君不見白頭拾遺
徒步歸明眸皓齒事皆非朝天泥滑袖封事高閣雨餘
宮漏稀

題黃門飛鞚圖

二首

元王惲

金錯盤陀落玉鞭春風飛影下瑤池丹青明見傳臚意
花柳深宮燕八姨

年年十月幸溫湯詔給詞臣半驕驕最見流雲瀟灑處
津陽春色曉蒼蒼

題崔婦乳姑圖

明 廖道南

君不見崔氏之婦乳老姑百年此事胡為乎風流豈啻
世所重遺節直與天為徒李母孝思似崔婦二姑堂上
遐齡暮修瀟春盤效婉儀蘋蘩歲祀開昌祚棟塘夫子
真逸民堂前蘭桂芳菲新梁鴻不獨稱偕老潘岳仍看
侍懿親

題杜韋娘圖

元 華幼武

霞佩飄飄金縷香緩歌白雪韻悠揚華堂舊日風流在

見慣司空亦斷腸

紅葉圖

元華幼武

鴛鴦瓦冷不禁秋採葉題詩出御溝
一點靈犀天地隔殷勤隨水向誰流

題唐宮題葉圖

元雅琥

彩毫將恨付霜紅恨自絲絲水自東
金屋有關嚴虎豹玉書無路託鱗鴻
秋期暗度驚催織春信潛通誤守宮
莫道銀河消息杳明年錦樹又西風

題紅葉題詩圖

元朱德潤

金殿風微拾墜紅
題詩聊寄御溝東
芳情有意隨流水
細字無心學斷鴻
別館乍涼霜透幕
長門深夜月移宮
才情偶爾成佳配
不道周南有國風

題美人書紅葉圖

明劉基

紅葉隨波豈自由
綵毫空復寫綢繆
無人解識詩中意
天上人間總是愁

美人紅葉圖

明王佐

謝家夫人詠柳絮黃陵女兒歌竹枝誰信長門秋澹澹
西風黃葉斷腸時

題紅葉仕女

明談震

初試宮妝步玉除詩成把筆更躊躇舊愁新恨知多少
盡向霜紅葉上書

題流紅圖

明林敏

玉溝澄晚色金屋閉秋塵鴛被辭君寵蛾眉妒妾身
庭霜葉赤永巷露苔新欲寫心中事含情祇自顰

盼盼燕子樓圖

明瞿佑

亞父塚前秋草合
虞姬墳上暮雲愁
如何一片彭城月
只照張家燕子樓

題主人壁間樊素小蠻圖

明石沆

江州司馬兩紅妝
水墨何人畫
此堂得似往年歌
意思却看今日舞
衣裳摹聲漫點櫻
珠破擬態輕拖柳
帶長別有幽情傳
筆底主人狂得且
須狂

題花蕊夫人像

元于立

玉屑丹砂和獺髓一點殷紅養花蕊冰肌玉骨自生涼
不信流年去如水火旗曉壓降王道貝闌珠宮長秋草
摩訶池上又西風流紅不向人間老

朝雲誦偈圖

明瞿佑

春樹紅顏一擲梭六如偈裏暗消磨主翁不悟榮華過
一笑重煩春夢婆

題蘇小小像

元于立

花宮玉燕啼酣春春風勞勞驅夢雲夢頃夢喜春不聞

紅萱露滴真珠裙
夜燕玎玲隔牕語
碧紗凝煙咽金縷
行雲妒殺巫山女
芭蕉葉葉黃梅雨

題劉平妻胡氏殺虎圖

元王惲

獸猛其如義烈何
揮刀峻絕魯陽戈
哀哀哭絕東山婦
恨入秋空淚漫多

再題胡烈婦殺虎圖

三首

元王惲

丈夫不作屠龍舉
健婦能成刺虎威
試著五行參造化
二陰何盛一陽微

眈眈哆口摧天去死地求生有若人寸鐵竟能伸義烈
大臣當國合橫身

古稱政猛苛於虎翦暴除殘惜壯圖喋血兩坊三義俠
袖鎚揮處幾於菟

為古紹先題劉平妻胡氏殺虎圖

元
張翥

沙河岸邊秋草白棗陽城頭落日黑老兵辛苦踐更來
林下稅車聊一息黃蘆颯颯中夜鳴悵鬼叫嘯悲風生

虎飢得人怒不置婦急徒手危相爭直前死力持虎足
呼兒進刀屠虎腹但知有夫豈知虎視之何殊几上肉
當時一擊寧顧軀驚魂碎骨仍攜扶九原瞑目已無憾
舊血勿前身上襦千秋節義傳鄉閭我猶膽怯見畫圖
健婦果勝一丈夫向來馮婦有不如

胡氏刺虎圖

元楊載

浣有烈婦人胡姓嫁劉氏從夫棗陽戍車宿水之澁夜
半猛虎至銜夫入菑翳夫人自驚起不暇生為計直前

執虎足盡力與牽制呼兒抽佩刀刀割虎立斃夫命復
不救復讐古所貴嗚呼流俗弊人義日以廢婦不夫其
夫臣子競為利害難苟圖免聞此得無媿吾故作此詩
於以告萬世

平妻殺虎圖

明程敏政

棗陽軍婦千人勇虎口活夫顏不動礪號山裂天為昏
幾許高樓髻雲聳征車夜渡西河眠骨肉相守終餘年
舅戕天死避苛政泰山女兒吁可憐

題高宗二劉妃圖

元潘純

秋風落盡故宮槐
江上芙蓉並蒂開
留得君王不歸去
鳳皇山下起樓臺



御定歷代題畫詩類卷四十四

欽定四庫全書

總校官庶吉士臣侍朝

校對官編修臣裴謙

膳錄監生臣倪時慶

欽定四庫全書薈要

集部

御定歷代題畫詩類卷四十五

六



欽定四庫全書薈要

御定歷代題畫詩類卷四十五目錄

閒適類

李伯時畫其弟亮功舊隱宅圖

宋蘇軾

昭武劉圻甫以嵎篁隱居圖求詩

宋戴復古

愛詩李道人嵩陽歸隱圖

金劉勳

愛詩李道人嵩陽歸隱圖

金雷淵

武元直畫喬君章蓮峯小隱圖

金趙秉文

春山歸隱圖

金趙秉文

坡陽歸隱圖

金趙秉文

盤山招隱圖

金閻長言

雪谿小隱圖

金張行簡

李道人崧陽歸隱圖

金史學

盤山招隱圖

金劉迎

松溪幽隱圖

金段成已

崧陽歸隱圖

金段成已

李道人崧陽歸隱圖

元 元好問

金南峯隱居圖

元 牟巖

武郎中桃溪歸隱圖

元 許衡五首

跋龍陽松隱圖

元 王惲

竹林幽隱圖

元 王惲六首

題舜舉小隱圖

元 趙孟頫

劉松年春山仙隱圖

元 鄧文原

北山招隱詞四首題李卿月小隱圖

元 柳貫

子久春山仙隱

元吳鎮

題劉渙中司空山隱居圖

元薩都拉

題蒙泉吏隱圖

元陳旅

題醫學李教授歸隱圖

元薛漢

雲山高隱圖

元鄭元祐

題富鍊師仙山訪隱圖

元陳基

田園幽隱圖

元劉永之

次韻玉瑯雲隱圖

元金涓

為曾高士畫湖山舊隱圖

元倪瓚

題張仙人隱居圖

元錢惟善

題龍虎孫希文尊師為蕭泰定所作丹房寓隱圖

元錢惟善

題秋溪釣隱圖

元華幼武

秋林隱士圖

元華幼武

題耕隱卷

元華幼武

題雲林子南村隱居圖

元吳全節

隱居圖

元張雨

賦童梅巖隱居圖

元馬臻

營丘江山招隱圖

元郭昇

李昇林泉高隱圖

元郭昇

縉雲歸隱圖歌

元唐肅

寄題瑣憲臣萬戶星湖釣隱圖

元王逢

山中隱居圖

元陶宗儀

題梅隱圖

元張天英

山中清隱圖 明汪廣洋

題隱居圖 明宋濂

題方方壺畫鍾山隱居圖 明宋濂

題清隱圖 明張以寧

題松隱圖 明張以寧

題鮑典籤芳塢隱居圖 明劉承直

題溪山小隱 明高啟

山泉隱居圖 明張羽

園隱圖

明 徐賁

題劉汝弼東源小隱圖

明 蘇伯衡

題雲林書隱圖

明 高棅

題五橋隱居圖

明 劉昭年

題趙仲淵家藏巨然山居舊隱圖

明 戴宗瑗

題秋山訪隱圖

明 藍仁

二隱圖

明 管訥

題王秉正雲林清隱圖

明 管訥

瓢隱畫歌

明虞堪

題荷峯雲隱圖

明夏原吉

題溪山深隱畫

明王世貞

溪山小隱圖長幅

明李日華

題溪山深隱圖

明李日華

題溪山小隱圖

明僧一初

林泉歸隱圖

明僧麟洲

欽定四庫全書薈要卷一萬九千一百五十三

集部

御定歷代題畫詩類卷四十五

閒適類

李伯時畫其弟亮功舊隱宅圖

宋

蘇軾

樂天早退今安有摩詰長閑古亦無五畝自栽池上竹
十年空看輞川圖近聞陶令開三徑應許揚雄寄一區
晚歲與君同活計如雲鷺鴨散平湖

昭武劉圻甫以嵎篁隱居圖求詩

宋 戴復古

相對兩山碧春風搖綠篁一巢雲建造三澗水宮商谷
口躬耕稼盤中歌壽昌桃花認行路此日訪劉郎

愛詩李道人嵩陽歸隱圖

金 劉 勳

脫却儒冠已自閑更令家事勿相關百錢便挂青藜杖
不看先生紙上山

愛詩李道人嵩陽歸隱圖

金 雷 淵

我家崧前凡再暮詩僧騷客相追隨春葩繽紛香澗谷

夏泉噴薄清心脾
霜林置酒曳錦障
雪嶺探梅登玉螭
重陽夜宿太平頂
天雞夜半鳴喔咿
整冠東望見日出
金輪湧海光陸離
神州赤縣入指顧
風埃未靖空噓歔
窮探極覽不知老
泉石佳處多留題
簡書驅出踏朝市
期會迫窄愁鞭笞
襟懷塵土少清夢
齒頰荆棘真白癡
叩門剝啄者誰子
道人面有熊豹姿
披圖二室忽當眼
貫珠編貝多文辭
我離山久詩筆退
摹寫豈復能清奇
再三要索不忍拒
依依但記經行時
道人愛山復愛詩

嗜好成癖未易移山中詩友莫相厭遠勝薰酣聲利乾
沒兒

武元直畫喬君章蓮峯小隱圖

金趙秉文

武君非畫師勝槩飽曾臆太華五千仞驅寫入盈尺飛
泉峯頂來落我松下石清風忽吹散琴上濺餘滴呼兒
忽寫之指下淋漓濕未知責子翁頗復有此適何如圖
中人直作林下客青山不違人但恐富貴逼勇退良獨
難此願誰能必向來燕趙間逆旅拜真逸兒時弄琴者

天涯老相識俛仰四十年父子埋雙壁卷中題詩人十
九已仙籍年光飛鳥過紙上但陳迹對此還自傷何事
為物役還丹日月遲白首光陰疾文章真小技身外皆
長物拂衣歸去來蓮峯入心碧

春山歸隱圖

金趙秉文

了無車馬到山家門外東風掃落花春入山間人不見
無時無處不煙霞

坡陽歸隱圖

金趙秉文

年過六袞尚蹉跎奈此坡陽歸隱何不是不歸歸未得
家山雖好虎狼多

盤山招隱圖

金閻長言

畫出盤中望隱歸鳴珂朝馬尚遲遲賦詩未敢輕相誚
却恐吾山也勒移

雪谿小隱圖

金張行簡

出處皆天豈自由仙標終合冠黿頭不妨貌取黃華景
時向鈴齋作卧游

李道人崧陽歸隱圖

金史學

石壁城頭夜斬關
軟紅塵底曉催班
道人一笑那知許
門外清溪屋上山

盤山招隱圖

金劉迎

溪山不難買
所費千金儲
不如數峯雲
朝昏對吾廬
交遊豈無人
轉盼傷離居
不如吾兄弟
相應如笙竽
左侯薊名族
溫溫器璠璣
身雖市朝寄
心與功名疎
伯也亦可人
文華炳於菟
風神聳魁偉
襟韻含沖虛
平生一片

心緣塵不關渠相期有幽事歲晚山林俱綵服照黃冠
歡呼奉親輿大婦侍巾帨中婦供庖廚諸孫戲膝前翩
然鳳將雛朝采南澗芹莫漉西溪魚煙霧入杖履風月
來窓疏觀竹上巢雲禮佛登香爐紅龍雪浪湧白塔蒼
煙孤冰絃寫天籟茶甌泛雲腴快哉天下樂俯仰餘何
須正恐左太沖招隱昔所無

松溪幽隱圖

金段成已

何宮遺構山之隅長松蔽映千萬株中有一徑穿縈紆

冷風蕭瑟無時無人間赤日如洪爐恍疑仙景來蓬壺
蹤跡一隨聲利區回首自覺泥塗污歲月因循歸計迂
松溪想像勞形模可憐塵夢今始蘇空對溪山慚畫圖
一日來歸聊自娛

崧陽歸隱圖

金段成已

落落出世人視世猶糠粃獨惟愛山緣一念未渠已嘗
行崧陽道經觀畧可紀有山皆孱顏有水盡清泚寒藤
絡古木奇花開芳枳風從四山下紅綠亂紛委雲日互

蔽虧百態呈怪詭微泉不知處叢蒼鳴宮徵山鳥忽驚
飛花落空巖裏靜聞雞犬聲人家應在邇百年能幾日
山間有餘晷孰知桃花源不出武陵水回首視人間囂
囂足塵滓便擬結椽茅怱怱迫行李一來汾沮洳留滯
繇幾祀幽懷渺難忘澹墨寄形似舊遊一經眼未往差
可喜此心本無著夫豈為物使昔何從而來今何從而
止翛然來往間於是得之子幻影竟安用我亦聊爾耳
一笑兩忘言庭花委階砌

李道人崧陽歸隱圖

元
元好問

北山范寬筆老硬無妍姿南山小平遠澹若韋郎詩崧
陽古仙村佳處我所知長林連玉華細路入清微連延
百餘家柴門水之湄桑麻蔽朝日雞犬通垣籬我出
山來京塵滿山衣春風四十日夢與孤雲飛可笑李山
人嗜好世所稀逢人覓詩句不恤怒與譏道人本無事
何苦塵中為京師不易居我癡君更癡山中酒應熟幾
日是歸期

金南峯隱居圖

元牟巖

高哉千丈屹南端
路入層雲欲到難
試著幼輿巖石裏
人間爭似畫圖看

武郎中桃溪歸隱圖

五首

元許衡

武陵曾有避秦人
人世高誇擬慕真
不道當今異前世
枉尋幽隱伴飢民
紅芳未比紅衣好
綠水爭如綠酒醇
營得一官裨聖政
誰能康濟自家身

桃溪將擬武陵溪
只恐桃溪隱未宜
詩卷久懷天下詠

畫圖今遣俗人窺嚴陵晦迹終垂釣韓伯韜聲猥學醫
此輩君侯休羨慕但當匡救主民疲

桃溪風景寫橫披渾似秦人避亂時萬樹春紅羅錦綺
一灣晴碧捲琉璃飲中更聽琴聲雅靜裏初無俗事羈
他日君侯歸此隱肯容閑客日追隨

門外鞦韆擺翠煙籬邊雞犬亦閑閑更教爛漫花千樹
對著縈紆水一灣好景已憑摩詰畫他年重約長卿還
尋思此處人心別又愛功名又愛山

果肯歸來學隱淪
閑中別有一乾坤
可人碧草自春意
入枕朱絃醒醉魂
花滿春風看錦浪
水明涼月話黃昏
此中意趣知多少
莫對簪纓取次論

跋龍陽松隱圖

元王惲

學窮象數別穿深
又向龍陽得洗心
前日小山叢桂客
不煩春草賦歸吟

竹林幽隱圖

六首

元王惲

西晉風流號七賢
筆牀茶竈共林煙
嵇琴響絕千年後

喜見清風一再傳

清時有味足閑身不可一日無此君著脚歲寒堂上去
秋風門外葉繽紛

蘇嶺桑麻杜曲田歲寒誰似此君賢鳴歌不種南山豈
千畝風煙學渭川

昔賢愛竹與竹友出處總得高人名今人未著牀頭屐
里社歸來晝錦榮

共城瀟灑似江南萬竹幽棲老所堪李沆似為諸子計

北山先婦讀書龕

煙雨溪南百畝春
盡將清景屬閑身
河山不隔黃墟斷
却恐功名老逼人

題舜舉小隱圖

元趙孟頫

有水清且泚
洄洑亂石間
樂哉三子者
在澗歌考槃
流波牽弱縷
輕颺動文竿
信無吞舟魚
我志匪魴鰈
勿言隱尚小
神情有餘閑
高士不可見
古風何時還

劉松年春山仙隱圖

元鄧文原

綠柳疎花遶舍栽，長松灌木覆亭臺。
雲巒倒景水天迴，蒲葦有聲山雨來。
內史幽情觴咏樂，右丞別業畫圖開。
何時許我遊真境，野色橋邊踏紫苔。

北山招隱詞四首題李卿月小隱圖

元
柳貫

煙雲奇彩稜稜見，水木高齋面面開。
畫裏青山雖甚似，夢中玄鶴幾曾來。

枰欄布葉尋常大畧行，通溪取次斜誰送。
茶煙來北崦

却留梅月在東家

徂歲蒼松驚出屋度秋黃葉看成堆
賴憑故篋書千軸
領取虛名水一杯

此圖盈尺山論丈何處看雲水似空
幸自冰壺堪作傳
莫憂瑤草未生叢

子久春山仙隱

元吳鎮

山家處處面芙蓉一曲溪歌錦浪中
隔岸游人何處去
數聲雞犬夕陽紅

題劉渙中司空山隱居圖

元薩都拉

放光峯下結茅廬
光照山人夜讀書
童子抱琴隨白鶴
鄰翁看竹借籃輿
門前秋景從風掃
屋後春田帶雨鋤
自歎天涯倦遊客
十年未有一廬居

題蒙泉吏隱圖

元陳旅

世皇昔日收雲南
鯨鯢伾伾手所戡
烏蒙烏撒腹心地
不有軍府誰其監
漢庭遣將非充國
累歲屯田無善績
兵驕民獷土不畚
國帑空虛糜萬億
大名劉侯文武才

承詔萬里誅蒿萊豪蠹盡戢戎壘立竄卒復還農畝開
有泉遠出蒙山下日夜清冰鳴石罅渠分澮決來縱橫
土脉浮膏作秋稼府中儲積多如山陂池種魚無曠乾
幾聞春磴響林際仍為蔬蔬流圃間劉侯暇日遊泉上
賓史追從意沖暢步隨涼影傍高松坐看晴雲起孤嶂
朱幡奕奕來甌閩喪車遄返黃河津雲南戰骨橫四野
布穀聲中荒草春劉侯雖死應愁絕吟魂空咽泉頭月
祇今寧謐重謀帥九原人去無歸轍荔枝臺館開樽時

劇談每及西南陲淒涼遺像畫圖裏對此流涕將奚為
題醫學李教授歸隱圖

元薛漢

一官歸隱絳山陽山色蒼茫接太行自古終南多捷徑
只今盤谷是康莊仙家虎賣林中杏洞府龍傳海上方
吾友玉堂稱二妙為君圖寫爛生光

雲山高隱圖

元鄭元祐

大山巖業如張旗小山偃蹇如褰衣巖頭千仞瀉飛瀑
迸珠濺雪交橫飛林廬隱隱空中起青紅棟宇相軒委

中有幽人歌紫芝自採藥苗臨澗洗喬林露下青童童
交柯老榦森虬龍豈無明堂棟梁柱還當采獻明光宮
寧無谷底白駒客考槃歌中風落日畫圖難寫西隱踪
一曲鸞笙度空碧

題富鍊師仙山訪隱圖

元
陳基

客有子微子學道居松陵身卧雪灘曲心將秋月明太
湖煙水催揚舲去訪隱者尋仙靈桃花之源浪得名何
如大海窺蓬瀛蓬瀛樓觀何崢嶸縹緲金碧之空青扶

桑東枝挂白日鉅鼇不動波濤平仙人王子喬乘風下
青冥要君與君語欣然若平生飲君以沆瀣之微液贈
君以琬琰之華英授君長生不死之奧旨保君神明愈
久而清澄丹丘羽客遙相迎足繭浮雲同上征蒼龍為
駕翠羽旂風伯前驅玉女仍直排閭闔朝紫清天上差
樂人間苦君獨何為思下土林屋深通水晶府勅制羣
龍主賜雨指麾豐隆使擊鼓飛蓋揚舲馮夷舞馮夷舞
罷樂未央昔年往遊今故鄉堯舜無為四海康千秋萬

歲下巢許長徜徉

田園幽隱圖

元 劉永之

我家清江縣城北竹梁花埭環深宅鄰屋分燈夜讀書
仙山借鹿春耕石蹤迹年來逐轉蓬萬事驚心舊業空
無錢買山惟愛畫坐對新圖如夢中柴門茂樹森相向
野水山橋接空曠雨足沙田野犢閑風回茅屋晨雞唱
隔林炊黍起新煙接竹穿籬引澗泉傍隄榆柳皆新種
近舍松杉不記年山深住久疎城府人情頗訝今非古

酒熟頻開白社尊家貧時賣黃公屨邇者中原相犄角
錦袍白馬相馳逐得失俱隨去水流至今猶記王官谷

次韻玉瑯雲隱圖

并序

元金涓

番陽王本善故居懷玉山之北號曰玉瑯雲隱鄉先
達進士董公為之記和陽王使君為之賦又得星源
韓徵君為之圖余嘗過本善所寓見其淨埽一室琴
書圖畫與弓劍雜前培桂植菊怪石纖蒲幽潔可愛
蓋能審已推分隨所寓而安視竄名尺籍而有所顧

願者不同科也乃次使君韻附於卷末以釋其幽思
云

馬上劍三尺山中雲半間無人尋草迹有虎卧柴關解
甲端陴後懸弓定地還胡為思舊隱畢竟復誰間

為曾高士畫湖山舊隱圖

元倪瓚

厭聽殘春風雨卷簾坐看青山波上鷗浮天遠林間鶴
帶雲還

題張仙人隱居圖

元錢惟善

百年曹氏宅萬古張仙山藏書白雲裏結屋青山間泉
迸石虹裂樹深溪鳥閒我欲從子遁騎驢相往還

題龍虎孫希文尊師為蕭泰定所作丹房寓隱圖

元
錢惟善

結茅雲裏萬塵空辟穀相期伴赤松晝夜常明羽人國
春秋不老蕊仙宮飛騰舐藥容雞犬蟠伏成形看虎龍
縮地壺天應有術願辭羈絆問參同

題秋溪釣隱圖

元
華幼武

長林蔽秋日飛雪捲秋旻道人愛滄浪為結白鷗鄰渺
渺泛舟楫悠悠理絲綸淡然適清興豈在鱸與蓴偉哉
桐江叟千載高其人笑彼桃源圖春花迷去津

秋林隱士圖

元
華幼武

巖扃半掩白雲深木葉蕭蕭秋滿林便欲操舟過溪上
一牕明月聽彈琴

題耕隱卷

元
華幼武

屏迹躬南畝殷勤為養親行歌農耒晚歸舞綵衣春茵

閣青山近柴門綠水新玄纁不肯就甘作太平民

題雲林子南村隱居圖

元 吳全節

山高白石秀竹密綠陰濃窓映風光埽溪流月影重

隱居圖

元 張雨

壺漿相餉過溪東縞袂青裙笑語中何必桃源尋舊路
太平閑作祝鷄翁

賦童梅巖隱居圖

元 馬臻

龐公不愛入州府自結衡茅住山塢蒸梨炊黍飽妻兒

幽事無人繼前譜
梅巖愛山存古心
卜築更向青山深
區區世事不掛齒
晝夜讀書松竹林
永讓盧鴻傳十志
圖此知君有真意
山中之樂何其多
白髮心違我應愧

營丘江山招隱圖

元郭昇

健枝無冗筆
樹外來江山
洲渚蘆荻空斜陽
澹煙鬟歸
鞍倦危橋短篷止
荒灣業漁古云樂
寧論晉宋間
菰米
蓴菜羹
妻兒有餘閑
坐令王李輩
濡毫破天慳
展玩不
去手
綠陰掩柴關
浩歌滄浪辭
濯我塵土顏
悠悠江湖

夢隱者招不還

李昇林泉高隱圖

元郭界

為厭繁華愛好山
幽棲贏得此身閑
生平已足林泉興
留取高名滿世間

縉雲歸隱圖歌

送陳魯山

元唐肅

高堂雪壁雲模糊
排君縉雲歸隱圖
縉雲之山古仙都
千朵萬朵青芙蓉
側聞軒皇此云徂
小臣白日攀龍胡
至今瑤草甘露腴
食之百歲顏如朱
陳侯十年戎馬劬

腰間厭帶黃金符侯封廟食何為乎不如還山尋舊廬
青林石道羊腸紆上有裊裊哀猿呼陳侯是時騎蹇驢
卓鞭微吟落日孤山中之人夷皓徒聞侯歸隱應笑娛
丹泉釀酒香拍壺玉桃如瓜味如酥陶然一醉千日餘
侯不歸來實侯愚

寄題瑣憲臣萬戶星湖釣隱圖

元王逢

笳鼓歸來理釣絲星連文石漾淪漪征袍漸喜團花暗
小艇還從細柳維邊地雪霜憐馬革五湖煙雨夢鴟夷

野人不待傳雙鯉釣出珊瑚寄一枝

山中隱居圖

元 陶宗儀

小小茅茨住碧山柴門無客晝常關
移家更入雲深處城市終年不往還

題梅隱圖

元 張天英

昔者山人住杭州和靖祠邊水東流
先人敝廬與祠近取徑政在山之幽
廣平梅花三百樹無復春風一樹留
芳煙野花開躑躅落日林樹啼鵲鷓
黃昏娟娟湖裏月

每為香影含孤愁長懷此花冰玉質無之自足令人羞
眼明波間雙白鷗亦復與世相沉浮不見梅花已淒怨
誰吹笛聲湖水頭青山難聞楚人調白髮易感商聲謳
吾廬亦豈能自愛種梅遶屋寧嫌稠二十年間屢易主
歸魂無夢花間遊因觀此圖重歎息萬事何異水中漚
知君斷非充隱者卜居梅花善自謀我獨漂零江海上
悠悠千古一登樓

山中清隱圖

明

汪廣洋

王屋山前雲氣多濯濯水流幽澗阿青松白石有如此
歲久不歸生薜蘿

題隱居圖

明宋 濂

樓臺倒景浸虛泓嘉樹擎寒不盡青何日過橋分半景
傍雲同築草玄亭

題方方壺畫鍾山隱居圖

明宋 濂

飄飄方壺子本是仙者倫固多幻化術筆下生白雲白
雲縹渺間拔起青嶙峋似是朱湖洞笙鶴遙空聞豈無

許飛瓊烹芝吸華芬鍊師從何來面帶山水文相期守
規中結菴在雲村心游帝象先神棲太一根我受上清
訣衛以龍虎君內涵玄命祕一氣中夜存行當去採藥
共入無窮門

題清隱圖

明
張以寧

清隱山人行地仙尋雲獨往不知年鶴翻松子驚碁局
鷗蕩蘆花逐釣船題句霜乾拈落葉煮茶月靜掬新泉
塵中汗馬多如許一度看圖一惘然

題松隱圖

明張以寧

蒼蒼鮮石謾謾雲松空山無人明月在筇我思武夷三十六峯之子云邁攜琴曷從

題鮑典籤芳塢隱居圖

明劉承直

幽勝似仙家緣雲石磴斜陰崖留積雪晴樹亂明霞寺遠時聞磬溪深未沒槎抱琴來谷口多是識桃花

題溪山小隱

明高啟

何處溪山隱衡門對野橋晚風攜鶴子春雨種魚苗小

徑斜通竹疎籬曲護蕉人生閑自足不問楚詞招

山泉隱居圖

明張羽

日長侍立南薰殿聖主從容正開卷內臣如鵲擁圖書
詔許近前曾一見玉躔金題照眼新三王二李迹未陳
妙筆森芒洞冥漠乃知今人非古人歸來三歎北牕下
開屏見此新圖畫流淙百折掛石梁古木寒松勢相亞
木末何人一草廬山泉之人昔所居鴻臚寺裏晚朝下
對此高堂心鬱紆華亭柳湖眼中見武陵桃源路豈殊

老夫曾住康王谷五老香爐映飛瀑亂來井臼今可存
因爾高歌望黃鵠

園隱圖

送方以常

明徐賁

曾聞學圃成高隱今日攜書是宦遊
隔屋尚通分溜竄傍溪宜覓看花舟
松葵盡作鄰僧供芋栗還憑野老收
後夜月明江上夢應隨歸鶴到林丘

題劉汝弼東源小隱圖

明蘇伯衡

東源山水好聞說似終南種黍都為酒
誅茅小作庵過

門人問字看竹客停驂亦有幽棲意遲歸我獨慙

題雲林書隱圖

贈梅江
許宗顯

明
高棟

愛爾江海居清風繼箕顓起予丘中賞逸興探靈境粉
墨含天光丹青藏雲影牕開象湖陰簾捲龍峯頂林靜
絃誦閑波空棹歌冷滄浪可洗心白鷗待孤艇

題五橋隱居圖

明
劉昭年

誰家作橋溪水頭茆堂四月如清秋白雲已過暮山碧
黃鳥不鳴春樹幽紫髯背向孤舟立記得仙源舊曾入

雨打疎篷醉不知
桃花一夜新流急

題趙仲淵家藏巨然山居舊隱圖

明
戴宗瑗

趙君生平有畫癖
購畫千金無所惜
軒窓日夕耿晴虹
鴈蕩雲煙動秋碧
山居之圖妙無敵
巨然乃肯留真蹟
雄峯峩峩狀廬阜
春風喬林翠如織
柴門路入花竹深
彷彿茅茨浣花宅
輕舟聚漁煙浪中
白石離離弄江色
山人構思固不易
造化神機出毫末
摩挲兩眼看不厭

趙君珍藏信奇特，媿我無詩如杜陵。此畫還君三歎息。

題秋山訪隱圖

明藍仁

草堂聞有故人尋，野店山橋轉石林。渺渺白雲行逕遠，
蕭蕭黃葉閉門深。脫巾自漉牀頭酒，賣藥新修壁上琴。
世事匆匆良會少，一宵論盡十年心。

二隱圖

明管訥

溪上放舟迴山中，負薪暇一笑偶相逢。於焉遂清話，寧
知有秦晉。況復論王霸，回首總忘機。青山夕陽下。

題王秉正雲林清隱圖

明管訥

青林白谷水雲鄉
隱者深居一草堂
百道松泉當戶落
四時花雨入簾香
門前車馬紅塵遠
座上琴書白日長
滿目故家風景在
不須重畫輞川莊

瓢隱畫歌

明虞堪

溪山昨日風雨來
溪上船子衝潮回
白鷗微茫度島嶼
綠樹恍忽迷塵埃
煙昏氣黑夜滂渤
石梁茅屋多傾頽
壺公畫裏何悠哉
寫此世外之蓬萊
弱水不渡良可哀

題荷峯雲隱圖

明 夏原吉

萬仞荷峯插漢青當年嘉遯若為情
田園無限幽閑趣車馬不聞來往聲
半榻松風雲卧冷一溪蘿月釣絲輕
只今聖主求賢急林下安能老釣耕

題溪山深隱畫

明 王世貞

古木寒流一兩家柴門晝掩待歸鴉
何如只向人間住與客攜壺踏落花

溪山小隱圖長幅

明 李日華

山隱園林樹隱家石田茆屋是生涯
雙流灌玉收香秣
萬壑跳珠汎落花松代笙簧風裏奏
雲開屏障嶺頭遮
一生不踏紅塵路竹杖芒屨步軟沙

題溪山深隱圖

明
李日華

生來骨相落谿山松作蒼髯石作顏
出語忽驚春瀑下
掛瓢時惹晚雲斑懸崖墮果煩猿
拾絕壑迷筇信鶴還
偶為修琴到城市踏沙又見月初彎

題谿山小隱圖

明
僧一初

自我初陟浮丘峯十年往還如夢中
向來朋舊半白髮
只有山色當時同
青橙叢邊數間屋
夜夜白雲簷下宿
道人心境雲共閑
嘯傲雲林謝塵俗
橋頭野客行遲遲
歸來似有東林期
一聲清磬萬山暝
知是上方禪定時

林泉歸隱圖

明僧麟洲

居山豈為山只愛此中閑
野菜何消種柴門不要關
飯餘聽澗落經罷看雲還
恐有寒山句多題蘚石間

御定歷代題畫詩類卷四十五